

V. PAZKO IGANDEA (A)

Otoitza

Jainko Jauna,
Zuk gaituzu salbatzen eta zeure seme-alabatzat hartzen;
ikus begi onez hain maite dituzun zeure seme-alabak;
eta Kristorengan sinesten dugunoi
emaguzu egiazko askatasuna eta betiko bizia.
Zure Seme Jesu Kristo.

I. IRAKURGAIA: Ap Eg 6, 1-7

*Zazpi gizon aukeratu zituzten,
Espiritu Santuaz beteak.*

Apostoluen Eginetatik

Egun haietan, ikasleak ugaritzen ari zirela eta, marmarra sortu zen grezi hizkuntzako artean heber hizkuntzakoen aurka: haien alargunak bazterrera uzten omen zituzten eguneroko zerbitzuan.

Apostoluek ikasle taldeari batzarrera deitu eta esan zieten: «Ez da bidezko, guk Jaungoikoaren hitza uztea, mahaiak zerbitzatzeko. Aukera itzazue, beraz, zuen artean izen oneko zazpi gizon, jakinduri espirituz beteak, eta lan hori beren gain utziko diegu; gu, berriz, otoitzean eta hitzaren zerbitzuan ariko gara erabat.

Batzarrak ondo iritzi zion asmo honi; eta hauek aukeratu zituzten: Esteban, sinesmenez eta Espiritu Santuaz betetako gizona, Felipe, Prokoro, Nikanor, Simon, Parmenas eta Nikolas, Antiokiako judutar berria. Apostoluen aurrera eraman zituzten; eta haiek, otoitz eginez, eskuak ezarri zizkieten.

Jaungoikoaren hitza gero ta gehiago zabaltzen ari zen; ikasle taldea ugaritu zen Jerusalemenean, eta apaiz asko ere sinestean egiten zen.

ERANTZUN SALMOA: Sal 32, 1-2. 4-5. 18-19

**R/. Betor gugana, Jauna, zure maitasuna,
Zugan baitugu gure uste ona.**

Edota: **Aleluia.**

Poztu zaitezte, zintzoak, Jaunagan,
zuzenak direnei dagokie Hura gorestea.
Ospa ezazue Jauna kitaraz,
egiozue soinu hamar hariko salteriaz. R/.

Zuzena baita Jaunaren hitza,
leiala Hark egin duen guztia.
Zuzen eta bidezko dena du maite,

Haren graziaz lurra dago bete. R/.

Hara, Jaunaren begiak beldur diotenengana,
Haren maitasuna itxaroten dutenengana;
haiek baititu heriotzatik aterako,
eta gosetea aseko. R/.

II. IRAKURGAIA: 1 P 2, 4-9

Zuek jatorri autatua zarete eta errege apaizgo.

San Pedro Apostoluaren epistolatik

Senide maiteok: Jaunarengana hurbiltzen zaretelarik –harri bizia baita, gizakiek zapuztua, baina Jaungoikoaren begietarako, aukeratua eta ederretsia–, zuek ere, harri bizi bezala, Espirituaren etxegintzan parte hartzen duzue, eta apaizgo santu bat izango zarete, Jesu Kristoren bitartez Jaungoikoak onartuko dituen espiritu opariak eskaintzeko.

Liburu Santuan baitago:

«Hona Nik ipini Sionen
giltzarri aukeratu eta bikaina;
eta honengan sinesten duenik
ez da lotsatuko».

Beraz, zuentzat –fededunontzat– aintzagarri da; sinesgabeentzat, ordea: «etxegileek baztertutako harria berori gertatu da giltzarria, eta irristagarri eta gaizpide harkaitz». Sinesten ez dutelako egiten dute oztopo hitz horretan, horretarako jarriak izan baitziren.

Zuek, ordea, jatorri autatua zarete, errege apaizgo, enda santu, Jainkoak aukeratutako herri, ilunbetatik atera eta argi zoragarria dei egin dizuenaren egintza harrigarriak oihuka ditzazuen.

EBANJELIOA: Jn 14, 1-12

Aleluia: Jn 14, 6

R/. Aleluia.

V/. Ni naiz bidea, egia eta bizia –dio Jaunak–;
ez doa inor Aitarengana,
nire bitartez ez bada. R/.

Ni naiz bidea, egia eta bizia.

Jesu Kristoren Ebanjelioa San Joanen liburutik

Aldi hartan, Jesusek honela esan zien bere ikasleei: «Ez izan bihotz-larririk. Sinets ezazue Jaungoikoarengan, eta sinets Niregan ere. Nire Aitaren etxean bizitoki asko da; hala ez balitz, esango al nizuen Nik, zuentzako tokia eratzera noala? Joan eta tokia eratu ondoren, etorriko naiz berriro, eta Neurekin hartuko zaituztet, Ni nagoen toki berean zuek ere egon zaitezten. Badakizue Ni noan tokirako bidea».

Tomasek orduan: «Jauna, ez dakigu nora zoazen, eta nola jakin bidea?» Eta Jesusek: «Ni naiz bidea, egia eta bizia. Ez doa inor Aitarengana, nire bitartez ez bada. Ni ezagutuko baninduzue, nire Aita ere ezagutuko zenukete; oraindanik ezagutzen duzue, eta ikusten».

Felipek, orduan: «Jauna, erakutsiezaguzu Aita, eta nahikoa dugu».

Eta Jesusek: «Hainbeste denboran zuekin egon, eta ez al nauzu ezagutzen, Felipe? Ni ikusten nauenak, Aita ere ikusten du. Nola diozu, "erakuts iezaguzu Aita?" Ez al duzu sinesten, Ni Aitarengan nagoela eta Aita Niregan dagoela? Esaten dizuedana, ez dizuet Nik neurez esaten. Niregan dagoen Aitak, Berak egiten ditu bere egintzak. Sinets iezadazue: Ni Aitarengan nago eta Aita Niregan. Sinets, bestela, Haren egintzengatik. Egi-egiaz diotsuet: niregan sinesten duenak, Nik egiten ditudan lanak egingo ditu hark ere, eta haundiagokoak ere bai; Ni Aitarengana bainoa».

Oparigaien gainekoa

Jainko Jauna,
opari honetako harreman miragarriari esker,
zeure jainkotasunean parte ematen diguzu;
egizu, sinesten dugun egia egintzetan aitortuz.
Jesu Kristo.

Prefazioa: Pazkoaldikoa.

Jaunartze ondorengoa

Zaude beti, Jauna, zeure herriarekin;
eta sakramentu hauen graziaz bete dituzunei
emaiezu, beren izate zaharra utzirik,
jainkozko bizi berriaren erara bizitzea.
Jesu Kristo.